

Machap: 74.35 peratus keluar mengundi
Malaysiakini.com
April 12, 2007

Proses pengundian pilihanraya kecil Dewan Undangan Negeri (DUN) Machap tamat jam 5 petang tadi dengan 74.35 peratus pemilih keluar mengundi hari ini.

Pengundian bermula jam 8 pagi tadi dengan kebanyakan pengundi yang datang awal terdiri daripada golongan warga emas dan wanita.

Sehingga jam 11 pagi tadi, hanya 23 peratus pemilih yang keluar mengundi.

Bagaimanapun, jumlahnya meningkat kepada 45 peratus atau 4,331 pengundi sehingga jam 12.45 tengahari tadi, kata Setiausaha Suruhanjaya Pilihanraya (SPR), Kamarulzaman Mohd Noor.

Sehingga jam 2 petang itu, jumlah pembuangan undi meningkatkan kepada 54 peratus.

Pilihanraya kecil Machap menyaksikan pertandingan satu lawan satu antara calon Barisan Nasional (BN), Lai Meng Chong, 56, dan calon DAP Liou Chen Kuang, 33.

Pegawai Pengurus Pilihanraya itu, Hasim Ismail pula berkata kesemua 19 saluran mengundi di lapan pusat mengundi dibuka sehingga 5 petang ini bagi membolehkan 9,623 pemilih keluar mengundi.

Pusat-pusat mengundi ialah di Melaka Pindah, Machap Umbor, Machap Baru, Ayer Pasir, Solok Menggong, Kemuning, Felda Hutan Percha dan Tebong.

Pengiraan undi akan dijalankan di pusat-pusat mengundi sebelum penjumlahan undi dan pengumuman keputusan dibuat di Kompleks Japerun Machap.

Keputusan dijangka ketahuai sekitar 8.30 malam ini.

Copyright © 1999-2007 Mkini Dotcom Sdn. Bhd.
Source : <http://www.malaysiakini.com/news/65827>